



Rotonde Sero Patrishi lo habri na April y esun di Ling & Sons den prome siman di Maart



ORANJESTAD(AAN): Elisa Chieh Chen Tang, Communications Manager di D.O.W Diaranzon mainta durante un conferencia di prensa a indica cu entre otro e intencion ta pa duna un update riba e proyecto di Watty Vos Boulevard. Chieh Chen Tang a splica cu e update ta riba e rotonde Sero Patrishi, Overpass Meiveld, rotonde Ling & Sons, Overpass Hato y ceramento di caminda rond di construccion di un rotonde riba Juancho Irausquin Boulevard, cerca di Amsterdam Manor. Durante e conferencia di prensa, General Manager di proyecto Watty Vos Boulevard Joao Soares a trece dilanti cu pa loke ta e rotonde di Sero Patrishi, esaki ta esun mas grandi, cu tin un diseño di paperclip, cu 5 entrada. "Tin un cantidad significativa di trabao di utilidad cu a wordo hasi, door di e

diferencia den nivel for di e camindanan cu ta conecta eynan". "Nan (WEB, Elmar y Setar) a hasi un hopi bon trabao y ta hopi dedica". "Aworaki ta mobilizando, unda cu e rotonde aki lo mester keda cla rond mitad di luna di April". Esaki segun Soares, kende a sigui bisa cu esaki ta un di e rotondenan mas complicaden e proyecto. Pa loke ta e rotonde na Ling & Sons, e prome capa di Asfalt a cuminza wordo poni Diaranzon. E intencion ta pa keda cla cu tur e trabaonan rond di esaki, pa e rotondo habri den prome siman di Maart. Soares a splica cu e trabaonan di e asina yama 'Overpass' na Meiveld ta bayendo hopi bon, unda cu na Juni lo habri e caminda, cu e overpass cla tambe. "Pa loke ta Hato, nos ta wak actualmente tur e problema di trafico y mas posi-

bel nos ta purba acomoda e trafico y stroba esaki menos posibel". "Nos ta studiando un solucion alternativo, pa minimaliza ceramento di caminda eynan". Esaki segun Soares, kende a papia tambe riba e rotonde cu ta bay bin na Juancho Irausquin Boulevard. "Pa Diahuebs nos tin un asina yama plan di circulacion di trafico implementa, despues cu a papia riba esaki cu polis y D.O.W". "Esaki ta pa minimaliza e

impacto pa usarionan di e caminda". "Mirando e problema actualmente rond di e luznan di trafico na Palm Beach, nos ta purba di causa menos molester posibel pa e trafico". "Nos ta bay traha for di Amsterdam Manor despues di e cruzada, te cu Divi Phoenix". "Nos ta bay ta trahando na e banda di tera, mientras cu e autonan lo pasa riba e caminda cerca di laman". Esaki segun e General Man-

ager di e proyecto, kende a indica cu lo no cera e parti ey di e cruzada mayan, sino solamente riba Diasabra. El a sigui bisa cu e autonan coriendo riba e caminda cerca di laman, lo core den ambos direccion. Ora cu a puntra Soares dicon ta bin cu un rotonde cerca di Amsterdam Manor, el a splica cu esey ta parti di e proyecto cu Gobierno a pone y cu fluho di trafico ta cana mihor ora cu tin un rotonde, compara cu ora cu tin un T-Kruising eynan.

Diario . - (diahuebs 21 februari 1991) ; p. 4